

S'IMU in sa massaria

In su mese de nadale de su 2011 comente su governu Monti at fatu sa Manovra Finanziaria (D.L. n. 201/2011), amus bidu deretu chi s'impòsitu nou, s' IMU diat aer penalizadu meda sa massaria. Confagricoltura dae deretu at naradu chi non fiat un'impòsitu zustu, cun efetos zurìdicos, finantziàrios e econòmicos isballiados.

Pro su chi pertocat sos efetos zurìdicos tocat de nàrrere deretu chi s'IMU est una "patrimoniale" chi corfet duas bortas sos benes produtivos agriculos, una prima borta cun s'impòsitu subra sos terrinos e una segunda borta assuzetende finas sos fràigos de su sartu, impreados dae s'impresa agricola pro traballare e pro istare.

Difatis pro su càrculu de sa base imponibile de un'impòsitu patrimoniale, in intro de sa capitalizazione de su rèdditu dominicale b'at finas sa redividade de sos fràigos de su sartu chi bi sunt in su terrinu. Custu est unu printzìpiu connotu dae semper in s'ordinamentu tributàriu e cunfirmadu dae unos cantos documentos de s'aministratzione finantziària.

Pro su chi pertocat sos efetos econòmicos, su pesu de s'impòsitu pro sa massaria est isballiadu meda ca s'IMU in zenerale est su 1,3% de su PIL (21,8 miliardos de èuros de intradas a fronte de pagu prus o mancu 1.600 miliardos de èuros de PIL), imbetzes pro sa massaria est tres bortas tantu. Difatis dae sos datos elaborados dae Confagricoltura diat resurtare, un'intrada de s'IMU agricola chi andat dae 1,2 miliardos a 1,5 miliardos de èuros (a fronte de carchi chentina de miliones previstos dae su governu in sa manovra de nadale) chi rapresentat su 4,8% de su PIL agrìculu de pagu prus a mancu 28 miliones de èuros.

In prus b'at finas efetos sozetivos, difatis s'imu pro unas cantas impresas creschet de meda, cun aumentos chi arribant belle a su 300%.

A livellu territoriale Confagricoltura Sardinna e sos ufizios provintziales ant chircadu de interessare sas aministratziones comunales pedinde de riduire su tantu de s'impòsitu (dae su 0,2% a su 0,1%), mescamente pro sos fràigos de su sartu impreados pro traballare.

In Sardinna, difatis, custu impòsitu nou arriscat de sighire a agravare sas cunditziones de una massaria chi zai est andende male. Una crisi manna chi in Sardinna s'azunghet a s'antigòriu de sas istruturas de su foras de biddu a su dàtziu mannu chi pagamus pro s'insularidade, a sa diferèntzia semper prus manna intre sos custos de sos benes impreados pro produrre, semper in aumentu, e su profetu de sos frutos bèndidos, a prejos semper prus bassos.

Confagricoltura, paris cun sas àteras Organizzazioni Agricùlas, at iscritu una litera a totu sos s'indigos de Sardinna pedinde, in unu mamentu de crisi manna, de riduire su tantu de s'IMU pro

sos terrinos agrìculos e pro sos fràigos de su sartu, gasi comente previdet sa norma, chi permitit a sas Aministraziones Comunales de minimare de su mesu su tantu de s'impòsitu previstu pro sos fràigos de su sartu e de riduire de meda su tantu de s'impòsitu pro sos terrinos agrìculos.

Confagricoltura e sas àteras Organizatzione Agrìculas, dae como a pagas dies ant a leare parte, cumbidadas dae su Presidente Cristiano Erriu, a su Cunsizu Rezionale de s'Anci Sardinna, allargadu a sos s'indigos de unas cantas comunas, pro firmare unu documentu unitàriu.

Custu documentu – a prus de nàrrere chi custas normas noas ant a fàghere aumentare sos custos de produtzione, chi arriscant de fàghere cunzare una truma de impresas agrìculas sardas e chi ant a fàghere dannu mannu a sa massaria sarda – pedint a su Cunsizu Rezionale de sa Sardinna de cunsiderare, averguare e aproare custu documentu; pedint a su lezisladore natzionale de mudare su tantu de sos impòsitos pro sos terrinos agrìculos; pedint in fines a s'Anci natzionale de interessare sas Comunas a manera chi deliberent pro abassare su tantu de sos impòsitos pro amparare s'interessu de s'impresa agrìcula.

Confagricoltura Sardinna cumprendet sa situatzione de difficultade de totu s'Itàlia, e si sapit bene finas de sos sacrificizios mannos chi depent fàghere sos tzitadinos italianos. Semper e cando custa “patrimoniale agrìcula” est grae meda pro sos massajos, ca corfet su “bene terra” in ispèssia sena li riconnòschere prus su caratere de bene rurale e sa funtzione de bene chi bisonzat pro traballare (e de su cale non si podet fàghere a mancu) e pro praticare s'atividade agrìcula.

Sos impòsitos subra sos terrinos e sos fràigos de su sartu ant a àere unu pesu contributivu chi, su bonu de sas bortas, non si podet prus sustènnere: sos impositos sunt aumentende finas a deghe bortas cunforme a cussos chi b'aiat in antis.

In una situatzione zenerale de crisi econòmica, in unu tempus in ue totus depent fàghere sacrificizios mannos, sa massaria non si cheret tirare in palas pro fàghere sa parte sua pro torrare a fàghere mòdere s'economia de su Paisu, e duncas non pedit iscontos, ma petzi zustesa: si su guvernù at fatu un'isbàlliu carculende su chi depet pagare sa massaria cun s'IMU, torret a fàghere sos contos e mudet sos impòsitos pro sas aziendas.